

李文忠公奏稿

李文忠公奏稿

卷之七十八目錄

海軍擬購新式快礮摺 光緒二十年二月二十五日

張之洞捐立義莊摺 光緒二十年三月十五日

定期巡閱海軍摺 光緒二十年三月二十二日

任邱礙難開河摺 光緒二十年三月二十八日

推廣機器織局摺 光緒二十年三月二十八日

校閱海軍竣事摺 光緒二十年四月二十五日

煙臺膠澳添設水雷片 光緒二十年四月二十五日

請嘉獎赫德片 光緒二十年四月二十五日

熱河總管津貼公費片 光緒二十年五月初二日

請緩鹽課奏銷摺 光緒二十年五月初二日

海軍經費報銷摺

光緒二十年五月十七日

鎮遠等八船報銷摺

光緒二十年五月十七日

展收鹽斤加價濟賑摺

光緒二十年五月十八日

展造塔城電綫片

光緒二十年五月十八日

醫院創立學堂摺

光緒二十年五月二十三日

永定河石壩竣工摺

光緒二十年六月初四日

黎熙德回國片

光緒二十年七月初三日

京引展限復額摺

光緒二十年七月初三日

奏報薛福成出缺摺

光緒二十年七月十二日

運庫撥款濟軍摺

光緒二十年七月十三日

倭擊高陞輪船片

光緒二十年七月十三日

請撥濟米濟軍摺

光緒二十年七月二十日

調回庫倫馬隊摺

光緒二十年七月二十二日

津紳集捐辦團片

光緒二十年七月二十二日

酌定海軍賞卹章程摺

光緒二十年七月二十二日

覆奏海軍統將摺

光緒二十年七月二十九日

粵將無庸調津摺

光緒二十年八月初三日

籌款購備新械片

光緒二十年八月初三日

奏留劉汝翼片

光緒二十年八月初三日

運銅赴朝鮮鼓鑄摺

光緒二十年八月初五日

彙報前敵軍情摺

光緒二十年八月十八日

據實陳奏軍情摺

光緒二十年八月二十日

平壤敗退自請嚴議摺

光緒二十年八月二十三日

李文忠公奏稿卷七十八

全集一之七十八

桐城吳汝綸編錄

海軍擬購新式快礮摺

光緒二十年二月二十五日

奏爲海軍鐵甲快練各船擬添購新式快礮酌定分年訂購由應領額款內陸續籌付價銀恭摺仰祈

聖鑒事竊據北洋海軍提督丁汝昌文稱鎮遠定遠兩鐵艦原設大小礮位均係舊式濟遠鋼快船僅配大礮三尊礮力單薄經遠來遠鋼快二船尙缺船尾礮位鎮定兩艦應各添克鹿卜新式十二生特快礮六尊濟遠經遠來遠三艦應各添克鹿卜新式十二生特快放礮二尊共十八尊並于藥器具又威遠練船前桅後原設阿摩士莊舊式前膛礮不甚靈動擬換配克鹿卜十生特半磨盤座新式後膛礮三尊並于藥等件均係海防必不可少之要需

請查核酌辦等情當經咨商總理海軍事務衙門接准復文以此  
 項礮位關係軍艦待用利器令將約需銀數奏明辦理當即飭據  
 軍械局會同支應局司道詳稱前項添購新式礮位共二十一尊  
 均連子藥器具按照克鹿卜廠定價確核估計連運腳保險等費  
 共約需銀六十一萬三千四十餘兩查奏定海軍章程凡添購大  
 批軍火應由海軍衙門核明另行添撥不在常年經費之內等因  
 惟目下海軍衙門戶部同一支絀若添此購礮巨款誠恐籌撥爲  
 難再四籌畫查每年山海軍衙門額定領銀二十萬兩專備鎮遠  
 等八船常年煤修及隨時添置各物之用近來支放力求撙節擬  
 自本年起會商海軍提鎮凡八船常年添置各件酌量停減卽就  
 備用項下設法勻湊移緩就急將鎮遠定遠兩鐵艦應添克鹿卜  
 十二生特快礮十二尊先行訂購連開花子藥器具共估需庫平

銀三十五萬四千餘兩暫由備用款內分年撥付仍歸入船報銷  
案內造報其濟遠經遠來遠威遠等四船應購各礮俟鎮定二船  
礮價付清後如備用項下仍可騰挪再行陸續添購等情開單請  
奏前來臣查德廠新式快放礮每六分鐘時可放至六十出之多  
其力可貫鐵數寸實爲海上制勝利器各國師船爭先購換北洋  
海軍鐵甲快練各船原設礮位當時雖稱新式但較現時快礮實  
覺相形見絀且海軍以定額經來鐵快等船爲巨擘船堅尤須礮  
利若礮位不多單薄過甚遇有緩急固不足恃亦無以壯聲威亟  
宜逐漸添購以資戰守惟是餉項支絀鉅款難籌茲擬於八船經  
費備用額款內竭力勻湊先購鎮定二船快礮十二尊俟有贏餘  
陸續購置似此分年辦理既有裨於軍實亦無須另籌帑項殊屬  
撙節得宜除清單分咨總理海軍事務衙門兵部工部查照立案

外理合繕摺具陳伏乞

皇上聖鑒謹

奏



張之洞捐立義莊摺

光緒二十年三月十五日

奏爲大員捐產贈族援案懇

恩賞給匾額以示嘉獎恭摺仰祈

聖鑒事據藩司裕長詳據天津府知府沈家本轉據南皮縣知縣  
殷樹森詳稱該縣紳士現任湖廣總督張之洞呈稱世居南皮宗  
支蕃衍貧乏不能自給者甚多之洞故父

特贈太僕寺卿原署貴州貴東道張鏌營思仿宋臣范仲淹遺規  
設立義莊以周宗族祇以邊省遠宦力不從心之洞渥荷

天恩服官中外三十餘年謹將歷年積存俸廉恪遵遺訓置買大  
于莊李習莊兩處田產其地一十三頃四十五畝有奇計價銀一  
萬五千七百七十五兩零投稅印契作爲闢族義莊凡族中貧苦  
之家老疾孤幼節婦及喪葬無措幼學無力考試無資者俱於此

項出產內分別伙助詳定章程存祠選擇族人公正誠實者經營  
闔族公同稽查永杜後人典賣照鈔紅契呈請蓋印附卷由該府  
縣加具印結詳司覈明請奏前來臣查現任湖廣總督張之洞克  
承先志捐置田產其值價銀一萬五千七百餘兩以贍宗支孝義  
之風足勵薄俗定例士民人等捐資贍族值千金以上者均請  
旨建坊咸豐八年吏部右侍郎張祥河捐田贍族經部議以係二  
品大員若僅照士民捐田之例似無區別奏奉

上諭張祥河捐田贍族古誼可風著加恩賞給御書匾額以示嘉  
獎等因欽此光緒九年原任兵部尚書許庚身十七年現任吏部  
左侍郎徐用儀十九年現任福建臺灣巡撫邵友濂均以捐產贍  
族經歷任浙江撫臣劉秉璋崧駿先後奏請蒙  
恩賞給匾額欽遵在案張之洞事同一律可否仰懇

天恩准照成案

賞賜

御書匾額以示嘉獎之處出自

慈施除冊結咨部外理合會同順天學政臣李文田恭摺具

奏伏乞

皇上聖鑒訓示謹

奏

定期巡閱海軍摺

光緒二十年三月二十二日

奏爲定期出洋會閱海軍恭摺仰祈

聖鑒事竊准海軍衙門咨開光緒二十年二月十七日具奏請

派大臣出海會校北洋合操一摺奉

旨現屆校閱海軍之期著派李鴻章定安認真會校欽此恭錄知照到臣伏查北洋海軍自十七年四月會校以後已屆三年海軍提臣丁汝昌統率各船春夏秋三季在北洋各海口往來操巡冬令封凍期內卽駛赴南洋各口周巡島嶼涉歷風濤精習技能熟演陣勢終歲勤動未嘗少休今春由香港南行遠至英荷屬地新嘉坡麻六甲檳榔嶼各埠爲向來中國兵輪所罕到該處華商趨視懼呼咸頌

國家威德西國新報亦稱羨有加謹經臣咨報總理衙門海軍衙

門在案提臣於二月杪還抵香港三月朔展輪北駛二十二日至  
津調集各船聽候操演至沿海各營礮臺爲水師根本歸宿之地  
歷年布置情事曾於上屆校閱案內會奏陳明其時大連灣威海  
衛臺工甫完後路營庫各工猶須添設旋議舉辦煙臺膠州澳防  
務現在煙島礮臺業經竣事膠澳各臺基亦已勘定接續興工年  
來應辦各端該將領等遇事稟商臣覆加察核隨時申做勛以督  
率弁勇奮勉工作嚴密操防現屆三年校閱之期奉

旨認真會校亟應會合水陸各軍詳細考察嚴明賞罰示以勸懲  
俾無時不在戒備之中且知逐年勤苦情形並得上達

天聽自必愈加激勵日進精強以仰副

聖主勤求武備慎重海防之意遵卽函商督辦東三省練兵事宜  
都統臣定安約定啟行日期臣趕將地方工賑各事分飭辦理就

緒總理水陸營務處臬司周馥現須留辦永定河要工無庸隨同  
出海臣定於四月初三日奉同直隸津海關道盛宣懷北洋前敵  
營務處山東登萊青道劉含芳候補道龔照璵等起程先赴小站  
校閱盛軍及大沽海口各營操演乘輪放洋徑往旅順定安亦擬  
至旅順會齊查看臺陽各工校閱毅軍親慶各營陸操東至大連  
遼洋面調齊鐵快各艦雷艇魚雷演陣打靶並調南洋廣東各兵  
輪隨同操演再登岸校閱銘軍陸操渡海至威海衛校閱綏鞏軍  
陸操其威大兩處臺庫各工均於閱操後就便查勘循海而南至  
膠州澳察勘礮臺基址形勢折回煙臺查看嵩武軍新築礮臺臣  
復渡海而北至山海關觀看直隸提臣葉志超所部各營操演及  
臺壘工程卽由輪車沿途查看新築鐵路回津往返約計二十餘  
日所有津署日行事件檄委長蘆鹽運使季邦楨代拆代行其緊

要公事仍封遞臣巡次核辦所有定期出洋會閱海軍各緣由理  
合恭摺由驛具陳伏乞

皇上聖鑒謹

奏

任邱礙難開河摺

光緒二十年三月二十八日

奏爲文安縣生員張作良等請開新河查勘地勢窒礙難行恭摺  
覆陳仰祈

聖鑒事竊臣欽奉光緒十九年十二月初二日

寄諭都察院奏順天文安縣生員張作良等以水患太甚懇挖新  
河以救民命等詞繪具圖說赴該衙門呈遞據稱西淀片九河下  
游夏令各河盛漲淀水無路宣洩爲各州縣巨害請添設橋座開  
挖新河庶幾水患可除等語所奏是否可行著李鴻章體察情形  
妥議具奏等因欽此臣查張作良等於上年十月間來津具呈當  
飭清河道天津道會籌妥議尙未稟覆欽奉前因仍飭該道等揀  
派熟悉水道地勢之員逐細踏勘妥議詳覆並分行各州縣邀集  
聯名遞呈之舉貢生監等各就近隨同委員前往指證形勢剖晰



利害以憑核辦該道等遴委候補同知章兆馨候補知縣何芳稜  
馳抵大城縣測量子牙河水勢現深七尺坎高水面四尺其深一  
丈一尺河口至隄東長二百七十丈較河口低三尺隄西較隄東  
低三尺自西隄起經由臧莊至旺只村長一千丈較隄西低五尺  
由旺只村至流標長一千二百丈較旺只村又低二尺統計較河  
口共低一丈三尺以子牙河底較之尙低二尺自流標至郭隄長  
二千五十丈與文安大窪相平又自郭隄至雙窰長六百三十丈  
低亦相等該處一帶村莊當子牙河水漲出槽尙不免漫淹爲害  
若月間新河歸入子牙則水勢倒漾直如高屋建瓴奔騰灌注後  
患何窮又至文安縣勘得自雄縣入境之龍潭灣起經山靳村至  
趙王河計長八百七十丈其河寬四尺深一丈餘趙王河至花木  
廠長四百丈其廠南間有河形二里餘自花木廠經山林近村河

家務至孫氏村共三千九百四十九丈與大城交界各段亦閒有  
河形高低不一惟文安地勢較之任邱雄縣大城各鄉封低窪形  
如釜底實無出路可籌又至雄縣勘得自任邱交界苟各莊西起  
經下村至烹耳灣南遙隄口接文安縣界止長六千六百丈高窪  
不等五官淀東西兩邊地勢最高淀居其中形如坑腹勢必不能  
開挖新河一經開挖則烹耳灣一帶附近淀水各村莊均受其害  
又赴任邱縣自古佛堂起經鄆州之苟各莊至五官淀按段履勘  
測量地勢不能順流而下先是該縣一百七村紳民李文福等以  
張作良不明地勢妄請開河加害鄉邑等情稟請勘詳該員等勘  
明情形核與稟詞相符至原呈列名之霸州文生吳文元差傳未  
到容城縣武生張景春查無其人清苑縣文生臧士芬游學外出  
傳訊高陽縣文生孟繼宗民人苑玉璫俱係張作良函約列名並

未親身赴京伊等不諳形勢無可指證文安縣文生陳環瀛等保定縣拔貢李誠中任邱縣文生栗滌源等蠡縣文生楊際春清苑舉人臧士果容城縣武生孔繁雲安肅武舉崔爾春多與張作良並不識面其在京請開新河委係捏寫姓名朦混呈請該紳民並不知情雄縣職員張力田等且以張作良捏稟開河害及鄰境先期稟訴大城縣生員魏景陶等亦以開河有害指證甚力各處紳耆僉謂新河不宜開挖眾口同聲安州文生劉國鈞等安州鄉文生楊金波等雖知下游開挖新河伊等地處上游水患可減但因地勢不宜亦無異議惟張作良不服開導一味狡執謂大城高於文安可從深開挖復請以子牙河現時水勢尙高於隄外二尺有餘儼經開挖水勢從高灌下何以禦之張作良理屈詞窮無可置辯該員等會同各州縣稟道核議詳覆前來臣查開挖新河有關

各州縣數百萬生民利害必須統籌全局合上下游地勢輿情一無窒礙方能定議該生張作良稟請開河之處係從任邱十二連橋以南方佛堂之上下再開橋一座使水由鄭州或由太平橋東之宗家灣均經苟各莊東入雄縣之五官淀下達文安之龍潭灣田家溝大城之郭隄村子牙村導入子牙河無論工段過長經費過鉅且將千里隄決破引注西淀之水南北橫流與康熙年間奉旨建隄本意大相違背輕改舊制貽害滋多況鄭州以北最爲窪下苟各莊以南地又高仰五官淀之中形如坑腹烹耳灣以東文安之南大城之北步步登高地勢水性均不相宜而子牙河口與大城旺只村逐一測量相去尋丈儼將新河開挖則子牙立見倒漾西淀與子牙河兩水並注任雄霸保文大各州縣永成澤國欲除水患而爲患滋大又查古佛堂距七里莊僅止數里宗家灣距

古佛堂亦僅數里道光初年紳民請於七里莊開河經御史張元謨奏請不行此後疊據紳民陳請均經議駁今張作良復興此議勘度地勢體察輿情均有不順該處紳耆均稱開挖新河上游州縣未見其利下游州縣均受其害委係窒礙難行應請毋庸置議張作良不明形勢以一人臆見妄請開河並敢捏寫多名危言聳聽實屬不安本分應將其文生斥革交該地方官管束以儆效尤其被函約列名及被捏寫姓名之紳民均應免究除咨明都察院查照並飭查張作良入學年分名次月行咨革外理合恭摺覆陳伏乞

皇上聖鑒謹

奏

推廣機器織布局捐

光緒二十年三月二十八日

奏爲上海機器織布局現已設法規復月無推廣辦法以擴利源而敵洋產恭摺仰祈

聖鑒事竊查上海機器織布局上年九月間被焚臣因大局所係斷難緩圖當飭津海關道盛宣懷趁封河期內暫行赴滬會同江海關道聶緝渠商明前辦紳商妥爲結束截清界限籌集資本一面規復舊局一面設法擴充附片陳明在案本年二月杪該道回津當飭仍回本任茲據將辦理情形稟請核奏前來臣詳加查核前布局所剩地基及燬傷機器鍋鑪鐵廢料估值無多該道到滬後會商聶緝渠及前辦紳商截清數目議明將前布局銀錢花布剩款除支付應還現款外按照各商股總計分攤不過二成其餘被焚無著各款悉歸以後商辦各廠按每出紗一包提捐銀一

兩陸緞歸繳以恤商艱一面招徠新股仍就織布局舊址設立機器紡織總廠名曰華盛月在上海及甯波鎮江等處招集華商分設十廠官督商辦總廠請辦紗機七萬錠子布機一千五百張各分廠請辦紗機四萬錠子至二萬錠子不等其有兼辦織布者請辦布機五百張至二百張不等統共紗機三十二萬錠子布機四千張合之湖北官辦紗機八萬錠子布機一千張共成紗機四十二萬錠子布機五千張如果紗布暢銷機器全行開辦約計每日夜可出紗一千包出布一萬疋每紗一包通扯售銀六十兩每年約得紗價銀一千八百萬兩每布一疋通扯售銀二兩五錢每年約得布價銀七百五十萬兩上海華盛總廠及華新大純裕源數廠現已購機建廠先行開辦其餘各廠亦經陸續措置商情尙形踴躍查光緒十八年各海關總結計進口洋紗值銀二千一百萬兩

又麻布斜紋布值銀六百二十九萬兩十九年亦大致相同中國財源頻年漏於外洋元氣暗虧無所底止且多銷一分之洋貨即少銷一分之土貨小民生計日艱隱患實在於此目前金鎊騰貴外洋運來紗布亦因而日昂若不乘時趕緊籌款購機自行紡織此後虛耗民財恐尙不止往年之數且恐洋商自運機器來華製造紗布則中國自有之利權必至一網打盡此臣所以日夜籌維力圖振興而不敢中止也中國試行西法創立公司從前經理未得其人商情疑阻此次督令盛宣懷等推誠勸導得於燬燼之餘另開局面儼能從此漸推漸廣未始非商務一大轉機除飭盛宣懷隨時相機認真督辦並由臣衙門核給各廠憑照嚴定章程必須華商資本方准領照購機擇地開辦併在上海設立公所互相稽查以杜影射仍照光緒八年奏定辦法比照洋布洋紗稅則飭



於出口新關完一正稅概免內地沿途稅釐俾輕成本而廣招徠  
惟是保護權利更須體恤商情核計現辦上海等處機器紡織各  
廠以及湖北官辦兩局全行開辦以後每年所出紗數較之近年  
進口之數已得十之八九所出羅布斜紋布二項較多而外洋紗  
布仍不能不入內地互爭銷售況洋布各色除羅布斜紋布之外  
中國棉花尙不合用若不酌示限制則跌價傾擠華商資本有限  
虧折堪虞應請

飭下總理各國事務衙門立案合中國各口綜計無論官辦商辦  
卽以現辦紗機四十萬錠子布機五千張爲額十年之內不准續  
添俾免壅滯至洋商販運機器在中國口岸改造土貨本係條約  
所無前准總理衙門咨行洋商販運機器有關華民生命有礙華  
民生計之物又爲稅則所不載者不准進口等因前爲思患預防

之計紡織機器華商既經限定額數如果洋商販運軋花紡紗織布及棉子榨油機器進口自行製造實有礙華民生計臣已咨明總理衙門飭令關道稅務司查明禁止近來日本廣開紗廠皆係日本商民自設並無洋商在內中國生齒尤繁自保利權斷不容外人稍生覬覦臣仍督飭現設各廠紳商請求種棉之法徐圖紡織細紗原布以期開拓利源漸敵洋產所有現籌推廣紡織紗布情形理合會同南洋通商大臣兩江總督臣劉坤一合詞恭摺具陳伏乞

皇上聖鑒訓示謹

奏

校閱海軍竣事摺

光緒二十年四月二十五日

奏爲會同校閱海軍及沿海陸軍並查勘各處臺陽等工事竣恭摺覆陳仰祈

聖鑒事竊查海軍章程每逾三年請

旨特派大臣會同北洋大臣出海校閱一次自光緒十七年會校以後已屆三年特蒙

簡派臣鴻章臣定安認真會校當將起程日期先後各奏明在案

臣鴻章卽於四月初三日率同北洋前敵營務處山東登萊青道劉含芳前任津海關道劉汝翼直隸候補道龔照璵等自津起程是日馳赴小站初五日至大沽初六日出海初七日至旅順臣定安已於先一日至旅十一日至大連灣十五日至威海衛十九日至膠州澳二十日至煙臺是晚臣定安渡海赴營口由陸路還奉

天臣鴻章於二十一日至山海關二十三日由鐵路還天津往返  
二十一日均值天氣晴明得以逐細履勘期竣事所有各處校  
閱情形應分別詳悉覆陳北洋海軍提臣丁汝昌先期調集所部  
定遠鎮遠濟遠致遠靖遠經遠來遠超勇揚威九艦及記名總兵  
余雄飛所帶廣東之甲乙丙三船記名提督袁九皋總兵徐傳隆  
分帶南洋之南琛南瑞鏡清寰泰保民開濟六船在大沽口會齊  
隨同放洋並派威遠康濟敏捷各練船先赴旅順口守候北洋各  
艦及廣東三船沿途行駛操演船陣整齊變化雁行魚貫操縱自  
如十三夜在大連灣以魚雷六艇試演襲營陣法攻守多方備極  
奇奧十四日定鎮濟致靖經來七艦乙丙兩船在青泥窪演放魚  
雷均能命中破的午後南北各船駛至三山島次第打靶於駛行  
之際擊寫遠之靶發速中多經遠一船發十六礮中至十五廣東

三船中靶亦在七成以上十七日在威海衛調集北洋兵艦小隊登岸操演陸路鎗礮陣法靈變純熟快利無前各處洋操實無其匹並調齊南北各船各挑水軍鎗隊二十名打靶每名三出均能全中旋於鐵碼頭雷橋試演魚雷嫺熟有準並令威遠敏捷廣甲三船操演風帆均甚靈速夜間合操水師全軍萬礮并發起止如一英法俄日本各國均以兵船來觀稱爲節制精嚴連日飭派記名海關道羅豐祿潘志俊存記道張士珩等分考旅順口之魚雷駕駛學堂管輪學堂水雷營學堂大連灣之水雷營威海衛綏聲軍之鎗礮學堂及南北岸水雷營學堂劉公島之水師學堂山海關之武備公所及水雷營發策考問條對詳明面試技藝並臻精密足備水陸將弁之選此校閱海軍操陣演雷打靶及考驗各學堂之情形也沿海陸路各防營臣等公同校閱四川提臣宋慶所

部毅軍八營久駐旅順訓練嫻熟鎗法步武最爲嚴整甯夏鎮總兵衛汝貴盛字馬步等營河北鎮總兵劉盛休銘字十營記名簡放道戴宗騫綏鞏軍八營記名提督黃仕林總兵張光前親慶軍六營記名總兵張文宣護軍兩營兼習英德操法均能一律精練直隸提臣葉志超所部正定練軍五營馬隊兩營能以綠營抽調之兵熟精泰西操陣之法署大沽協副將羅榮光協標六營親軍礮隊操練亦頗精純銘軍綏鞏軍護軍慶軍頻年工作兼顧操防勤苦有加實爲難得綜計各軍鎗隊打靶多中至九成六七分以上此校閱海口礮臺各防營陸操之情形也至沿海各處臺廠庫工程旅順辦防最早南北兩岸臺壘及大石船塢各工疊經先後奏陳在案道員龔照珙於船塢口門內鑲砌石幫斜砌石撐滿砌石底以防滲漏於口門外添製大鐵船門以備輪流啟閉不誤

油修於陽旁添建吸水廠大鐵房一座用大石塞門德土砌五丈深六丈方水池一區涵洞五十餘丈蓋船陽爲北洋最鉅之工關係緊要必須妥善善後俾資經久又建鉚鍋廠合攏鍋鑪廠大鐵房各一座舢板廠大鐵房一座船械局庫一所所以備各艦更換鍋鑪製造舢板領換器械之用改造摸珠礁饅頭山礮臺各一座自西岸海口後營起至城頭山礮臺前面計十里沿築長牆一道又於西岸老虎尾東岸白玉山各建鐵碼頭一座大連灣威海衛兩處新造臺壘臣於十七年大閱案內業經奏明現購到後門長礮均已扼要分配齊備總兵劉盛休於大連灣之老龍頭與黃山接連之處添築長大牆一道計八百餘丈黃山礮臺添設護礮八卦牆兩座運子石牆兩道老龍頭和尚島分設子藥庫兩座柳樹屯添造水雷營一座道員戴宗騫於威海衛南北岸原設六礮臺外

又於柏頂九峯頂楊峯嶺謝家所四處添建新式陸路礮臺各一座於仙梯嶺馬蹄嶺分建子彈總庫火藥總庫各一座添修拐角快礮臺田鷄礮臺其三座南北兩岸各建水雷營一座自衛城至上莊開通山道九十里修木石橋一百座西接煙臺嵩武軍所修橋道總兵張文宣於劉公島南嘴添築礮臺一座又於島中山溝建總藥庫一座甜水倉一座山頂築護牆一道其長十里又築南嘴土牆一道島西接連之黃島添設地阱礮臺一座臣等於十七日至黃島次日至日鬪試放地阱大礮於隔海數里外置靶一擊而中瞬息升降靈準非常此係旅威大三處十七年以後接辦各工臣等周歷履勘工程并極精堅布置更臻完密至膠州澳口原擬於北岸之青島坦壘團壘各設礮臺一座臣等逐處察勘登州鎮總兵章高元承辦各臺基址已具所擬安設礮位處所尙得形



勝惟國島適當海口來路一臺尙嫌單薄擬於島左添築礮臺一座分置二十四生特長鋼礮三尊十二生特長快礮兩尊均用新式磨盤架四面環擊道員龔照璵又於青島前建設大鐵碼頭一座現擬於鐵碼頭後建造水雷營緊扼口門章高元原帶僅止廣武兩營前經山東撫臣福潤奏調嵩武兩營歸其節制調遣當飭該鎮督率四營將弁認真合力工作以期早日告成至煙臺海口原議於歸岱玉帶兩山分建礮臺惟玉帶山形勢過露易爲敵乘改於通伸崗舊礮臺下建臺一座漢中鎮總兵孫金彪統帶原駐海防之嵩武四營承辦兩臺現已竣工並於中營東面臨海加修長牆一道於後營就通伸崗舊壘接修護牆一道於轆水灣通伸崗兩處各建藥彈庫一座歸岱山下建石碼頭一座山頂建設學堂一所自煙臺至上莊開通山路九十里中修木石橋五十三座

東接綏遠軍所修橋道臣等察看所修礮臺純仿西式曲折通靈與威大兩處臺工一律堅固西國兵官嘗稱中國將領近年於西洋工作研究愈精所作臺礮輒有後起爭勝之意英國水師提督福勒曼德爾來看大連灣各處礮臺訝其工堅費省謂非藉資兵力斷不及此此外各局廠製造西洋鎗礮藥彈水雷均能力求精進不憚繁難儲備各項戰守器具足敷操演之用此察看各處臺礮廠庫等工之情形也臣鴻章於山海關校閱畢後乘坐火車由新造鐵路回津六百餘里半日而達極爲便捷沿途閱視所作橋軌工程均極堅穩每里工價較之西國猶爲節省自灤州古冶以東皆歸官辦接至山海關二百餘里中多石山大澗較古冶以西商辦之路工作倍難中隔灤河一道建設大鐵橋一座長至二百二十丈工費最爲艱鉅此順道察看鐵路之情形也竊查十二年

醇賢親王巡閱北洋覆奏疏內預籌各口辦防形勢謀慮至爲周詳而尤諄諄於添置船艇慎固陸防推廣學堂三端實爲不刊之論西洋各國以舟師縱橫海上船式日異月新臣鴻章此次在煙臺大連灣親詣英法俄各鐵艦詳加察看規製均極精堅而英尤勝卽日本最爾小邦猶能節省經費歲添巨艦中國自十四年北洋海軍開辦以後迄今未添一船僅能就現有大小二十餘艘勤加訓練竊慮後難爲繼至先後添置魚雷艇十三隻經道員劉含芳教練精熟以之守口尙足自防陸軍則自十二年後始議辦威大之防十七年後始議辦煙膠之防現威大逐漸經營已成重鎮煙膠兩處僅有八營分布兵力稍單惟煙臺本是威海後路膠澳形勢緊曲但使臺礮得力扼要自守尙無須屯戍重兵兩處臺壘計日可成此後

京師東面臨海北至遼濟南至青齊二千餘里間一氣聯絡形勢完固各口添設學堂不乏穎異之才惟水師各學生教成以後並無新添練船尙苦無從位置以上三事仰體

醇賢親王締造未竟之志頻年設法布置終以限於財力未能擴充臣鴻臚忝膺海寄久領北洋任重責專時深悚懼惟有隨時與總理海軍衙門量力籌商固不敢以規模稍具偶涉疏虞尤不敢以餉力未充稍存諉謝自經此次校閱之後仍當督飭水陸各將領等勤求戰備奮勉工操以期仰副

聖主慎重海防之至意各員弁頻年勤苦不無微勞應由臣等查明按照奏定章程擇尤分別保獎海軍衙門各總辦章京等仍照案由該衙門另行奏保以昭激勸所有會校海軍及沿海陸軍並查勘各處工程緣由謹合詞恭摺由驛具陳伏乞

皇上聖鑒訓示再水陸營務處直隸臬司周馥現辦永定河要工  
津海關道盛宣懷因病請假俱未隨同前往合併聲明謹  
奏

煙臺膠澳添設水雷片

光緒二十年四月二十五日

再海口設防全恃水陸相爲依輔岸上則恃臺礮水中則恃水雷環瀛諸國經營海疆必須雷礮兼精方稱完固北洋各口大沽北塘山海關旅順大連灣威海等處均已設有雷礮現辦煙臺膠州兩海口防務事同一律宜各設水雷弁兵一營各製下雷輪船一艘所需購辦電器傢具電綫自造各種水雷及下雷輪船舳板建造營房電綫池庫屋鏡房各項用款除由山東海防捐項支辦外其水雷弁兵兩營月餉軍裝每年各需銀一萬數百兩小輪船兩艘薪餉操習料物煤價每年各需銀七八千兩其歲需銀三萬六千餘兩係爲經久額支之餉必須籌有的款北洋經費極絀無可勻籌東省又無別項可撥再四籌維惟有東海關洋藥釐金一項從前專供泰安輪船薪餉自該船裁撤後經臣咨明戶部仍留此

款歸還泰安挪用洋稅欠項今冬計可還清此項收數每年約計二萬數千兩除去緝私各費所餘將及二萬兩擬俟還清前欠之後留作煙臺膠澳兩水雷營暨海口下雷輪船月支薪餉之用分別先後擇要舉辦其有不敷再行設法籌付以東關原有之餉留濟本口要需無須別籌款項於海防大局深有裨益理合附片陳請伏乞

聖鑒訓示施行謹

奏

請嘉獎赫德片

光緒二十年四月二十五日

再燈塔船樁爲大海行船嚮導關係匪輕中國海面遼闊港汊紛歧縣互萬餘里經總稅務司赫德歷年設立警船燈塔浮樁等共二百六十餘處如北洋之大沽曹妃甸遼河口鎮瑯嶼成山頭崆峒島猴磯嶼及海軍提臣丁汝昌商同添造旅順老鐵山威海衛趙北嘴等處均屬險要地方自設置燈塔後往來船隻卽遇風霧不致迷向觸礁於水師行駛商船人貨獲益非淺現值巡閱海軍臣等順道勘視北洋各處燈塔船樁深爲合法該總稅務司赫德盡心籌辦不無微勞擬請傳

旨嘉獎以示鼓勵出自

天恩謹附片具

奏



熱河總管津貼公費片

光緒二十年五月初二日

再據熱河都統臣慶裕函稱熱河正副總管管理內外

行宮三十餘處看守

陳設什物訓練護

苑兵丁按季操演尙須籌貼犒賞每年因公用款約需二千金所得養廉公項不過二百餘金不敷甚鉅擬請援案奏請津貼等因臣查熱河正副總管兩缺向係

簡派內務府司員充補三年方准更替歷任俱因賠累視爲畏途伏念

朝廷體恤臣工凡京員奉差外省莫不優給俸廉俾敷公用熱河總管防護

宮苑訓練兵丁責任甚重差務勤苦實與關樞織造不同每年所

得僅二百餘金賁以竭蹶從公殊有難支之勢臣於十八年籌辦  
熱河善後事宜請加都統公費並擬給道府以下各員津貼經部  
議准在案熱河總管缺分視地方各官尤爲苦累自應一律酌加  
津貼以資辦公擬請援案加給該兩總管每年津貼銀各一千兩  
仍由津海關稅項下按季撥付是否有當附片具陳伏乞

聖鑒訓示謹  
奏

請緩鹽課奏銷摺

光緒二十年五月初二日

奏爲援照歷屆成案請緩長蘆本年正課奏銷以恤商艱仍無誤奉撥各餉恭摺仰祈

聖鑒事竊據長蘆鹽運使季邦楨詳稱蘆商正課例限五月奏銷自同治十年後商情艱窘節經

奏准緩至十月啟徵茲因例限將屆催令各商完納據通綱商人晉有孚等一百二十三商稟稱直豫各岸災歉頻仍銷絀本虧商累實甚歷年蒙將正課展緩藉可專顧春秋兩運仍於秋運後趕緊完課並未誤解餉期限且能增交銀數實於課款商情兩有裨益今催令照限完納苟能遵辦曷敢視展緩爲常例惟自直豫疊被災祲以後商力尙未復元上年順直復遭大水受災極重各岸銷數頓減本年春運過關鹽僅十二萬包出庫引僅十五六萬

道疲滯情形已可概見釐商累多殷少全賴存運回標以顧秋運  
秋運回標以顧課款此時萬難兼顧懇將本屆正課奏銷援照歷  
屆成案展緩該運司詳加體察確係實情若令依限完納力實未  
逮徒事參追無裨實際請緩至本年十月啟徵仍可無誤奉撥各  
餉並聲明永屬鹽課奏銷屆時隨同辦理以憑核計等情具詳前  
來臣查長蘆正課前因商情艱窘疊次奏請展緩均蒙

恩允但可依限催納豈容稍任稽延惟直隸引岸向稱疲困近三  
屆引課全完商力已形竭蹶本年春運極少銷滯標絀周轉愈難  
菜秋爲眾商命脈所關刻值告運喫緊鹽尙未銷課從何出既經  
查明屬實應援照歷屆成案籲懇

天恩俯准將光緒二十年正課奏銷緩至本年十月辦理以恤商  
艱卽以保全課帑屆時仍當督飭運司認真催徵並將本屆奉撥

各餉於年內解清斷不敢稍任遲誤理合恭摺具陳伏乞  
皇上聖鑒訓示謹  
奏

海軍經費報銷摺

光緒二十年五月十七日

奏爲北洋海軍經費光緒十七年收支各款分造清冊並開清單報銷仰祈

聖鑒事竊北洋海防用款前經總理各國事務衙門會同戶部奏明由督辦大臣咨報總理衙門戶部查核嗣於光緒九年八月部議行令三部分銷歷經循照辦理自十五年正月起北洋海軍各船俸餉悉遵海軍衙門奏定章程分別開辦經臣奏明遵照新章收支月作起訖以清界限當將十五年第一案收支各款報銷業經三部照准十六年第二案亦已循例造報內有戶兵兩部行查各款月文登覆餘均奉部准銷在案茲據海防支應局司道詳稱十七年分第三案收支北洋海軍經費應仍照新章接續造報前已將新支各款照章造冊詳咨立案聲明舊有支款毋庸再行立

案外計十七年分北洋海軍報銷第三案舊管項下截存銀四萬二千五百六兩零新收各省開解到稅釐銀一百二十六萬七千一百三十三兩零又各處領用解還軍火價銀七百三十三兩零准軍協撥行營製造局造子薪工及電報學堂經費銀二萬三千一百六十九兩零北洋電報官局收繳商報信資銀一萬二千三百七十九兩零扣存京平平餘銀三萬七千三百五十二兩零其新收銀一百三十三萬四千三百三十九兩零連舊管共銀一百三十七萬六千八百四十五兩零內除扣存平餘銀三萬七千三百五十二兩零係應解海軍衙門之款即於十八年分應領鎮遠等七船備用款內劃抵歸入七船案內列收造報又天津機器局十七年分添造新式長礮鋼彈栗色火藥經費銀四萬兩由該局自行造銷分別照案登除外實計收用銀一百二十九萬九千四百九十三

兩零其開除項下應歸戶部核銷各款內水雷魚雷等營共支銀六萬二千一百九十七兩零學堂船塢電報醫院各局廠等處員弁人等共支銀二十四萬五千六百五十二兩零學堂船塢礮臺練軍等處雇用教習洋員共支銀四萬二千三百十五兩零川資地價及雜支等項共支銀二千一百四十七兩零准餉協撥造子薪工等項共支銀二萬一千七百四十三兩零應歸兵部核銷各款內海軍員弁兵勇俸餉共支銀二十六萬五千八百二十四兩零各海口及內河輪艇共支銀三萬八千七百九十五兩零各兵輪雇用教習洋員共支銀三萬六千一百六十三兩零卹賞運腳等項共支銀二萬九千七百八十九兩零應歸工部核銷各款內采買等項共支銀三十萬三千九百六十三兩零各項工程共支銀四萬三千七百九十九兩零各處修理共支銀五萬九千三百



九十三兩零各項製造其支銀十二萬六千二百六十一兩零統  
共支銀一百二十七萬八千四十七兩零其餘銀二萬一千四百  
四十五兩零已接支十八年以後用項循案造具三部分銷細冊  
收支四柱總冊開具款目清單詳請奏咨核銷前來臣查十七年  
分北洋海軍經費係由海軍衙門按常年額支之款核定指撥遇  
有必須添購要件添建要工不在歲撥數內者照奏定章程本應  
另請添撥惟京外庫款同一艱窘深恐籌撥爲難祇可由工需雜  
費項下截長補短竭力騰挪湊辦值此時艱餉絀非特新增用項  
必加詳審卽舊有支款無不由臣督同在事各員隨時考察可省  
卽省至常年操防應購外洋軍械器具等項其貴賤良窳尤必多  
方比較始行訂購惟海軍一切用款並無例案可循亦非他項軍  
需可比臣覆加察核均係實用實銷並無絲毫浮冒除各冊分送

戶兵工三部並咨總理各國衙門總理海軍衙門外理合開具簡  
明清軍恭摺具陳伏乞  
皇上聖鑒敕部查核准銷謹  
奏

鎮遠等八船報銷摺

光緒二十年五月十七日

奏爲北洋海軍鎮遠等八船光緒十七年支用各款分造清冊並開清單報銷仰祈

聖鑒事竊北洋海軍鎮遠定遠濟遠三鐵艦致遠靖遠經遠來遠四快船薪糧公費醫藥費並煤修采以雜支及致靖經來四船洋員薪飯等項銀兩向章按常年額支之數派員赴海軍衙門請領來津專款存儲隨時核發將動用數目咨報海軍衙門查核並將光緒十二年至十四年用款造冊請銷嗣於十五年正月起海軍各船俸餉改按海軍衙門奏定新章分別開辦又自十六年五月新增平遠鋼甲一船所支各款亦經海軍衙門覆准按年籌發歸入七船案內造報所有十五十六兩年收支各款遵照新章按年造冊報部內十五年分工部核銷各款業經核覆照數准銷餘均

未經核覆其兵部疊次駁查各款又經月文逐一登覆各在案茲據海防支應局司道詳稱十七年分鎮遠等八船俸餉薪糧公費醫藥費並煤修采買雜支及四快船洋員薪飯等項銀兩應接續造報計鎮遠等八船俸餉等舊管項下十六年底截存京平銀二萬三千二十一兩零新收海軍衙門發給鎮遠等八船俸餉京平銀十二萬兩又海軍鉅款截至光緒十七年正月底收回息款到撥八船俸餉庫平申合京平銀九萬七千四兩零直隸新海防例捐款內開撥八船俸餉庫平申合京平銀十九萬四千五百三兩零管收其京平銀四十三萬四百八十兩零其開除項下應歸兵部核銷八船俸餉公費醫藥費共支京平銀三十八萬九千七百八十四兩零下餘京平銀四萬六百九十五兩零歸入十八年分遞接造報又四快船洋員薪飯款內舊管項下十六年底截存庫

平銀三千七百七十三兩零新收直隸新海防例捐款內劃撥洋  
員薪飯庫平銀八千九百七十兩零管收其庫平銀一萬二千七  
百四十三兩零應歸兵部核銷四快船洋員薪飯其支庫平銀一  
萬一千六百三十五兩零下餘庫平銀一千一百八兩零歸入十  
八年分列收造報又鎮遠等船煤修等費舊管項下十六年底截  
存庫平銀八萬九千四百九十五兩零新收直隸新海防例捐款  
二次劃撥庫平銀十六萬三千六百三十一兩零又北洋海軍經  
費十六年分扣存京平平餘款內劃撥庫平銀三萬六千三百六  
十八兩零管收其庫平銀二十八萬九千四百九十五兩零應歸  
工部核銷煤修采買等項其支庫平銀十六萬三千八百九十二  
兩零應歸兵部核銷弁兵卹賞及運費報資等項其支庫平銀七  
千九十七兩零統其支庫平銀十七萬九百九十兩零其餘庫平

銀十一萬八千五百四兩零已接支十八年分用項造具兵工兩部分銷細冊四柱總冊開具款目清單詳請奏咨核銷前來臣查八船俸餉等項悉照奏定章程支給其煤修采買等項亦經臣督同海軍提督隨時考核實係操防攸關萬不可省之款始准動用惟多與洋人交涉或係估定包辦之件向無例案可循亦非他項軍需可比一切用款均已隨時咨報海軍衙門有案實用實銷並無絲毫浮糜除各冊分送兵工兩部並咨海軍衙門外理合開具簡明清單恭摺具陳伏乞皇上聖鑒敕部查核准銷謹奏

展收鹽斤加價濟賑摺

光緒二十年五月十八日

奏爲展收直岸鹽斤加價以恤商艱而裨賑款恭摺仰祈

聖鑒事竊長蘆行銷直岸引鹽前因運本過重商累太深奏准自

同治十三年六月起每斤加賣價制錢二文稍資津貼五年爲限

嗣經前國子監司業汪鳴鑾請推展蘆商賣鹽加價以助直賑飭

據運司議自光緒五年六月起展限五年責令商人每年交銀二

萬兩彌補直賑不敷之款迨限滿賑款未能交足又於光緒十年

十五年兩次推展各五年在案應於本年五月限滿據運司季邦

楨詳稱直岸商人楊俊元等以近年順直引岸連遭大水各河漫

決銷數異常減滯運路亦極艱難加以竈灘被水歉收生鹽價昂

成本尙重各商困累情形較前更甚且光緒十六十八兩年順直

水災上年晉邊旱災蘆綱眾商於此項加價之外月捐賑款銀十

五萬兩按引攤繳至今尙未捐足請再將加價展限五年以資補  
苴查此項加價前請展限五年實令每年交銀二萬兩以歸庫墊  
兼濟賑需本擬五年限滿商力稍紓卽請停止惟近年順直各岸  
連遭水患銷滯運艱成本加重商累倍深兼以直晉災賑疊捐鉅  
款力愈難支惟賴加價一項稍資周轉現屆限滿仍難停止係屬  
實在情形且直隸偏災時有籌辦工撫亦可於此取給請自光緒  
二十年六月起直岸賣鹽加價再予展限五年仍實令每年隨引  
交銀二萬兩實於賑務商情兩有裨益等情具詳請

奏前來臣覆核無異相應籲懇

天恩俯准照辦以恤商艱而裨賑款理合恭摺具陳伏乞

皇上聖鑒訓示謹

奏



展造塔城電綫片

光緒二十年五月十八日

再前准伊犁將軍長庚函商擬由庫爾喀喇烏蘇至塔爾巴哈臺  
官路九百餘里一律展接電綫以通邊報查新疆南北兩路電  
綫均已次第置設塔城緊接俄邊現有副都統及領隊大臣駐紮  
實爲邊疆重地刻值喀什噶爾電綫工竣開辦伊犁電綫乘此鳩  
匠興工之際續行展造塔綫一氣呵成俾全局消息靈通可收事  
半功倍之效惟新省餉需支絀祇能認籌購運枰木之費此外工  
款物料照前辦迪化喀什噶爾兩案核實撙節估計實需銀四萬  
餘兩必須另行籌款經臣商准總理衙門咨復塔城展造電綫所  
需經費銀四萬兩應照案在海軍衙門天津生息應還出使經費  
款內提撥應用並准海軍衙門咨行如數照撥應由臣飭發總辦  
電報事宜津海關道盛宣懷趕緊采購電料派員查勘綫路俟伊

犁電綫設成後卽行接續趕辦各項經費核實動支事竣彙案報銷以免功虧一簣並由新疆撫臣分飭沿途營縣預爲采購木料按里分屯俾便取用除購運木料及常年養綫修理經費仍由新疆撫臣籌定具奏外所有籌辦接展庫爾喀喇烏蘇至塔爾巴哈臺電綫緣由謹會同陝甘總督臣楊昌濬新班巡撫臣陶模合詞附片具陳伏乞

聖鑒訓示謹

奏

醫院創立學堂摺

光緒二十年五月二十三日

奏爲天津總醫院遵照海軍章程接續開辦著有成效估需經費銀兩恭摺仰祈

聖鑒事竊查光緒十四年八月奏定北洋海軍章程內載天津儲藥施醫總醫院與威海衛旅順口水師養病院由海軍提督水師營務處津海關道會商派員管理等因威海旅順兩醫院已於光緒十五年開辦屆造報准銷有案天津總醫院內分西醫學堂施醫院儲藥處三大端專司購儲材料診治弁兵並挑選生徒分班肄習俾學成後派赴海軍各營艦充當醫官尤爲北洋各醫院之根本由臣督飭津海關道等漸次經營旋經該關道督率官商捐籌鉅款在天津城外創建醫院房屋一百八十餘間惟該院內應設西醫學堂所有教習生徒人等復添建住房七十八間估需

工料銀八千三百餘兩。月山海防支應局籌撥竣工酌擬章程。試辦該總醫院。應派正副總醫官監督員司夫役人等名額薪費。均參酌天津水師武備各學堂成案變通辦理。選募聰穎生徒撥入西醫學堂分班肄業。訂雇英國醫官歐士敦來津。偕同洋漢文教習擬定課程盡心訓迪。院內應購中西各項傢具需銀四千餘兩。按照武備學堂准銷成案。撙節購用於光緒十九年十一月初一日開院試辦。海軍各營艦及各礮臺防營弁兵內外各症隨時診治。有效遇有四方貧民求診亦酌給方藥。所選頭二班學生分習洋文醫理。講員編摩均能領悟。經該關道等先後稟報並據天津海防支應局司道核詳奏咨立案前來。臣查西洋各國行軍以醫官爲最要而救治傷科直起沈痾。西醫尤獨擅專長。其學以考求經絡辨別藥性爲始基。以察臟腑之運行練臨症之理法爲進步。

其究以洞內科之精微平諸家之同異爲極功非專門名家歷經  
考試該國家未能給憑診治北洋創辦海軍之初雇募洋醫分派  
各艦爲費不貲是興建西醫學堂造就人材實爲當務之急臣於  
威海旅順兩醫院開辦後卽遵照海軍章程接續籌議自天津醫  
院告成試辦至今著有成效該總醫院所設員司人等各有專司  
月共支薪工經費銀九百三十餘兩每年應支銀一萬一千二百  
餘兩其餘應需書籍器具筆墨紙張等項並頭二班學生按時考  
課應給加贍等銀仍照水師武備各學堂章程隨時核實稟支均  
在北洋海軍經費內動用現雇之洋教習將來期滿時察看如各  
醫官學生等技藝精進能與西醫頡頏卽隨時裁撤不在常年經  
費之內至撥過添建學生住房工料購置中西傢具各銀兩應卽  
彙案分款造銷其津海關道督率官商捐建之醫院業據聲明出

白樂輪不敢仰邀獎敘自應免其造報該醫院甫經創辦一切用款尙難遽定續有未盡事宜容再隨時酌核撙節變通以期妥善除月支薪工經費核定銀數分咨海軍衙門及戶兵工部查照立案外所有遵照海軍章程開辦天津總醫院緣由理合恭摺具陳伏乞

皇上聖鑒敕部查照謹  
奏

永定河石壩竣工摺

光緒二十年六月初四日

奏爲永定河盧溝橋以上南岸新建減水大石壩依限趨辦完竣恭摺仰祈

聖鑒事

竊臣上年籌議永定河辦法擬擇要地添修減水石壩分

洩盛漲經戶部據函附奏欽奉十一月十三日

寄諭盧溝橋以東增置減水大壩乾隆以後具有成規事何可行

應如何擇要添築之處著李鴻章妥議具奏等因欽此當派臬司

周馥前往會同候補道張運芬該河道萬培因查得該河從前減

壩甚多現僅存南二金門閘北三求賢壩俱在河之中腰不甚得

勢近年異常盛漲未至減壩而上游已溢上游南上灰壩建自道

光年間減漲初甚得力迨後河底淤高光緒十八年放水奪溜隨

卽堵閉今欲添建減壩應於上游盧溝橋南岸擇其易於減溜而

不奪溜之處相度建置以補南上灰壩之不足減下之水仍歸南  
上減河故道不致月佔民地雖創實因惟斟酌水勢地形必欲常  
漲少減異漲大減而又不致吸奪正溜此中消息機宜頗難探討  
復派精於測算之副將陳季同並洋員吉禮豐赴工會勘議於盧  
溝橋以上南岸卽上年漫溢處所建設減壩甚屬合宜酌定壩口  
寬五十丈龍骨金剛牆及出水坦坡簍箕俱用大料石砌做連同  
兩面石隄土隄壩下減河其估需銀二十六萬七千四百五十九  
兩時值東河督臣許振禕奉

命查勘永定河上下游情形以該處建壩爲釜底抽薪之計仿照  
成規行之決定有益必當就大汛以前飛速趕成會同臣奏蒙  
恩准飭部撥銀三十萬兩以應急工當派候補道寶延馨駐工監  
修隨時會商周馥等妥辦限於汛前告成並委大順廣道吳廷斌



會同辦理本年二月初十日開工飭將做成分數逐月報核計自  
興工以來每日夫匠萬數千人分投力作晝繼以夜喘汗不停需  
用料物繁多派員四出購運並於北上石隄工內移緩就急以資  
接濟又慮限期過迫灰漿未能乾透過水或致衝損開平煤礦局  
有仿洋式製成塞門土運來三百數十萬斤以之鈎砌石縫填築  
槽底較石灰堅結易乾該司道等激勵員匠多方懲勸分段責成  
均皆踴躍用命幸天氣暢晴款料應手臣復催飭竭力趕辦據報  
於五月十五日全工完竣計砌成壩口大料石龍骨寬五十丈高  
八尺大料石坦坡寬五十丈進深三丈五尺出水簷寬五十丈  
進深十九丈內用大料石鋪砌三丈塞門土和砂石築成十六丈  
龍骨兩面金剛牆高二丈二尺五寸進深四丈一尺兩面片石隄  
其長三百五十九丈高一丈三尺五寸至二丈一尺五寸不等土

隄其長一千四百十三丈四尺高九尺至一丈一尺不等頂寬二丈五尺至三丈五尺不等開挖引河長七百五十丈深四五尺不等寬五十丈三十丈不等下游護村隄長一千四十四丈臣檄派委用道劉啟彤前往逐細丈量驗收均屬相符各工堅固整齊布甃如法絕無草率偷減足以宣洩盛漲裨益工防其高低尺寸亦均斟酌至當陳季同與吉禮豐細加考校若正河水長一丈四尺八寸與龍骨相平漸長則漸洩若照光緒十九年異常大漲壩上應過水六尺必不掣動正河大溜致添下游清河之患惟此處出山之水過於迅猛河中積成沙灘坍塌無定嗣後每年汛前須測量一次以沙灘之坍塌定龍骨之高下應責成該河道隨時與河防局妥商籌辦以期經久無敝該壩保固日期即自本年五月十五日起限照例保固三年至該處地當孔道伏秋減壩洩水文

報行旅未免阻滯擬建鋼橋一座長五十丈寬一丈六尺可過三  
千斤重之大車橋之兩面護以鐵欄開設燈架兩頭接鋪石道並  
加石欄應設石橋墩七座每座高一丈五尺卽砌於龍骨之上此  
橋應向西洋訂購鑄造需時本年秋後運到明春始能設妥今夏  
壩上過水暫行設船濟渡以便行人再查原領部款三十萬兩除  
撥歸浚船項下用銀三萬二千五百四十一兩外壩工實照原估  
用銀二十六萬七千四百五十九兩惟原估並無橋工在內現已  
墊款趕辦俟橋成之後核計不敷若干卽在賑捐款內提用屆時  
核實報銷除將減壩防汛事宜片陳明外所有新建減水大石  
壩依限趨辦完竣緣由理合恭摺具陳伏乞

皇上聖鑒敕部查照謹

奏

黎熙德回國片

光緒二十年七月初三日

再德國游擊黎熙德自光緒十三年應募來華派充北洋武備學堂總教習在堂八年教授學生均能盡心課導勞瘁不辭各生徒獲益甚多頗著成效今因病銷差回國據武備學堂總辦等稟請給獎前來臣查該教習在堂多年始終勤奮俾學生得有成就不無微勞足錄仰懇

天恩俯准

賞給該教習德國游擊黎熙德二等第三寶星以酬勞勩除俟奉旨後由臣飭令照式製給並咨總理各國事務衙門轉發執照轉給外理合附片陳明伏乞

聖鑒訓示謹

奏

京引展限復額摺

光緒二十年七月初三日

奏爲京商銷滯累深原停引目仍難復額請再展限五年以恤商艱而保課運恭摺仰祈

聖鑒事竊查長蘆京綱額引七萬二百餘道前因引多銷滯各商包課力實難支經前督臣曾國藩奏請停引二萬道餘令勉力辦理俟行市暢旺相機議加旋准部議以五年爲限嗣於同治十三年光緒五年十年十五年四次限滿均經臣奏蒙

恩准推展五年扣至光緒二十年底又屆限滿疊飭運司督商設法疏銷並嚴定月銷成數認真考核無如京商額引過多道光二十八年查辦案內每引又加鹽一百五十斤鹽包增重銷數益滯雖停引二萬道而現行之引尙有五萬二百餘道計光緒十六年領銷引三萬三千九十八道十七年領銷引二萬九千六百六十

五道十八年領銷引三萬二千七百二十六道十九年領銷引二萬八千七百四十道本年秋關已屆僅領銷引一萬七千六百六十二道均不及減剩五萬二百餘道之數實因銷路有限勢難全領其滯引課帑仍須各商包賠且頻年災歉鹽價運腳較前倍增上年北運河紅廟決口挽運維艱改由車運腳價較尋常驟加數倍商累已深若將停引二萬道責令復額則必多賠二萬引之課帑力更難支據京商恩裕泰等瀝情稟由運司李邦楨具詳請展前來臣查鹽課攸關餉需現值時艱帑絀但可多增一引卽多一分課款曷容稍涉推延惟引數必以銷數爲衡近年來災歉頻仍減剩引數尙未銷足其勢實難再加卽使勉強抑勒徒多參懸仍無實濟相應仰懇

天恩准將京商原停引二萬道自光緒二十一年起照案推展五

年以恤商艱而保課運俟限滿察看銷數如能暢旺再行議加仍飭運司實力督銷漸圖復額所有原停京引請展年限緣由理合繕摺具

奏伏乞

皇上聖鑒訓示謹

奏

奏報薛福成出缺摺

光緒二十年七月十二日

奏爲前任出使大臣遂次因病出缺代遞遺摺仰祈

聖鑒事竊前任出使英法義比國大臣都察院左副都御史薛福成於四月間交卸使任因歷年在外洋積受風溼觸發舊疾請假回籍就醫於五月杪行抵上海疾劇不能前進延醫調治不效延至六月十九日出缺繕就遺摺專丁航海呈請代遞并將行用關防齎送前來臣查已故副都御史薛福成學識深穩淹通古今在故大學士曾國藩幕中多年深被器賞平日講求經世之學於洋務利弊尤爲洞澈源流光緒十年由直隸候補道蒙恩簡放浙江甯紹台道正值法越事起沿海辦防升任撫臣劉秉璋檄令總理營務統籌戰守機宜備禦初定寇氛已逼浙防聲勢本弱敵人乘隙來窺以兵船駛入均被我軍擊毀相持四十餘日



卒不得逞固守之功一時稱最和議既成議辦善後添造臺壘購備礮位至今屹然爲浙洋重防十五年擢湖南按察使旋奉

命改授京堂充出使大臣在外五年遇事持正力爭不避繁難前後條奏事件如長江教案及各島添設領事豁除出海舊例嚴禁私購軍火各端皆關係中外大局仰蒙

俞旨飭下施行而於辦理滇緬界務一案爭回漢龍天馬鐵壁虎踞四關分得野人山內之昔馬及潞江以東之科干地方於滇境西南邊外均有展拓收回車里孟連兩土司管理全權隱杜英法窺伺滇邊之萌有裨於邊防者尤大臣屢接雲貴督臣王文韶來書稱其深心毅力獨爲其難所有辨論詳細情形疊經總理衙門隨時奏聞在案該大臣於出洋之初染患時症以使事緊要扶疾遊行英國交涉事務最多倫敦四面瀕海風霧不時水土異宜復

增喀血之疾頻年調理迄未痊愈東還正值盛夏感受紅海之炎鬱印度壘澎洋面之颶颶病益不支該大臣年未六旬志力本健自以渥蒙

知遇同報方殷其趨功之勇治事之勤實爲今日所罕見當此洋務需才之際方期得效尺寸之長中道摧折深堪痛惜伏查已故戶部侍郎曾紀澤兵部侍郎洪鈞廣東巡撫劉瑞芬並以曾經出使外洋身歿之日

朝廷念其前勞優加

賜卹薛福成奉使績效亞於曾紀澤過於洪鈞劉瑞芬等竟以積勞致疾奄忽告終既未能覆

命闕廷並不得首邱鄉里比於諸臣尤爲可悲應如何

加恩從優賜卹之處出自逾格

慈施非臣所敢擅擬該大臣之于直隸候補知縣薛瑩運候補知縣薛瑩中因聞病亟前往省視其身後事宜臣已電飭辦理上海招商局道員沈能虎就近妥爲照料回籍所有前任出使大臣途次病歿代遞遺摺緣由除將關防咨送總理衙門查照外理合恭摺具陳伏乞皇上聖鑒謹奏

運庫撥款濟軍摺

光緒二十年七月十三日

奏爲籌撥運庫正雜等款以濟軍需恭摺仰祈

聖鑒事竊據長蘆鹽運使李邦楨稟稱倭氛不靖戰局已成值此庫藏空虛增兵購械籌餉實爲最急查運庫經徵正課近皆照額全完除撥解外稍有積存又軍需復價一款係隨引帶徵專供省津防餉之用歷年以來銖積寸累亦尙有餘以上兩款於備支京協各餉之外約可騰挪銀各十萬兩以備用兵之需又長蘆各商近依畿甸世受

國恩更宜及時自效惟綱情疲累雖屢經奏准調劑無如引岸疊被水災銷數短絀周轉維艱且近年公捐部餉及直晉災賑先後輸銀二十五萬兩本年又報效經費銀十萬兩若再令集捐商力實有未逮該司悉心籌畫查有應徵戶部內務府步軍統領太僕

寺等衙門帑利一項係現商空賠前商虧本之息歷年因商情疲  
敝欠解累累徵補無期現經該司飭令眾商先行設法陸續借墊  
銀四十萬兩准其抵交從前積欠帑利專備軍務急需各該商等  
感於義憤均踴躍樂從而在京各衙門以積欠無著之款轉濟公  
家之急又無關其現年支銷揆諸公忠體

國之忱必無異議惟是綱情困敝已久輸鉅款不遺餘力茲又  
於無可搜索之中爲竭澤而漁之計商力有限此後宜加培養其  
餘舊欠帑利及一切額外捐款均應寬緩以蘇積困而保現課等  
情稟請奏咨前來臣查倭人構衅內防外剿募勇購械及遠道轉  
運繁費甚多需餉孔亟該司季邦楨在於運庫正課及復價項下  
各籌銀十萬兩又飭令眾商先行借墊銀四十萬兩抵交從前積  
欠帑利專備軍務急用實屬力顧大局應請照辦以備撥用除咨

部查照外理合恭摺具陳伏乞  
皇上聖鑒敕部立案施行謹  
奏

倭擊高陞輪船片

光緒二十年七月十三日

再倭人於六月二十三日在朝鮮牙山洋面乘我無備擊沈租用英國高陞輪船內裝載兵勇九百五十人二十四日法國利安門兵船行至該處從高陞船桅頂及漂流舢板中救出兵勇四十二人及高陞舵工升火三人當船沈時斃水逃入海島各弁兵經德員漢納根送信停泊仁川之德國伊力達斯兵船駛赴該處載回兵勇一百十二人並高陞水手升火八名漢納根又於煙臺會同德兵船主商之英國播布斯兵船再往該處截回弁勇八十七名先後送至煙臺均經妥爲撫卹分起回營查此次法德英三國兵船先後救回二百五十二人急難仗義深可嘉尙前經電達總理各國事務衙門向駐京各國公使致謝所有法國兵船主高格德國船主世襲伯爵副將寶瑞森英國船主參將斐理三員德國駐

津領事官司長德幫同照料聯絡深明大義合無仰懇

天恩俯准均賞給二等第三寶星又德國副管駕千總石文得德

寶滿爾羅蘭水師醫官守備美志格等四員擬請

賞給三等第一寶星又德國總舵工把總葛那士水師文案把總

博爾格漢等二員擬請

賞給三等第三寶星又德國水手頭目馬羅士格擬請

賞給四等寶星水手包安羅納士蘇立士安伯司達安德喜米德

等六名擬請

賞給五等寶星以酬勞勩而聯邦交際俟奉

旨後由臣飭令照式分別製給並咨總理各國事務衙門繕發執

照轉給祇領外謹附片陳請伏乞

聖鑒訓示謹



奏

請撥漕米濟軍摺

光緒二十年七月二十日

奏爲請撥江北江蘇河運漕米接濟軍食恭摺仰祈

聖鑒事竊行軍以籌餉爲先而籌餉尤以軍食爲急淮軍分屯北洋沿海各處拱衛

京畿各營勇籍隸南方均食稻米平時由各軍自行赴南采買津滬一水相通源源接濟現當倭人構衅戰局已開北洋陸續增募勇營內防外剿計新舊已百餘營每月需米甚鉅南洋因斷倭人接濟禁米出口雖已奏准仿照閩省辦法給照采運惟因倭船游弋海氛不靖招商局輪船未便照常駛行各洋輪亦不敢裝運米石來源已斷市價頓昂軍食告匱亟應先事預籌查本年應起運十九年分江北河運漕米十二萬六千六百八十二石零江蘇河運漕米十萬石內欽奉

恩旨截留順天直隸賑米各五萬石外實起運江北交倉正米七萬六千六百八十二石二斗四升一勺月耗米五千三百六十七石七斗五升六合八勺又江蘇正米五萬石月耗米二千八百八十四石六斗一升五合四勺共正耗米十三萬四千九百三十四石六斗一升二合三勺現已渡黃入運不日當可抵津合無仰懇天恩准將前項正耗漕米十三萬餘石並隨漕輕齎等銀儘數截留由臣派員驗收擇倉存儲酌定價值及支放章程委派司道大員專司其事每月發餉時按營搭放米石以接濟軍食所放米石即由北洋發餉各局所照數扣抵各該營正餉並將隨漕輕齎等銀湊發軍需彙案造銷庶軍食無虞缺乏士氣可期飽騰於大局裨益匪淺理合恭摺由驛馳陳伏乞  
皇上聖鑒訓示謹

奏

調回庫倫馬隊摺  
光緒二十年七月二十二日

奏爲宣化練軍馬隊遵

旨馳赴通州一帶駐防並擬將駐防庫倫馬隊一營調回經棚擇

要扼紮俾資彈壓巡緝恭摺仰祈

聖鑒事竊查駐宣化練軍馬隊向只中右後三營自十七年熱河教  
匪變亂曾經調赴赤峯經棚剿賊事定後即將後營留於經赤之  
交巡防彈壓又由中右兩營內抽撥六哨在於張家口獨石口外  
會同多倫左營常川巡緝是宣郡馬隊僅存四哨現在軍事喫緊  
欽奉電

旨飭調該營據宣化鎮總兵王可陞將派防各處右後兩營全行  
撥調仍由中營抽撥兩哨作爲該鎮親軍馬隊其餘三哨暫留宣  
郡兼爲十屬三廳聲援藉可稍弭土匪結夥爲害而備緩急以上

內營兩哨一俟由口外飭調到宣卽令該鎮親率馳赴通州迤東一帶由臣相機酌飭擇要分布駐紮惟口外經棚地方與赤峯各蒙古游牧連界大漠無垠道路紛歧教匪馬賊出沒無常深慮竄擾爲患已飭署多倫協副將徐平川暫抽左營一哨會同該處汛官分投緝捕究嫌兵力過單因查有駐防庫倫之宣化練軍馬隊前營現在北邊無事該處所屬蒙古圖車兩盟官兵尙可設法自衛未便以內地有用之兵久置遠戍擬請調回經棚一帶扼要分紮庶迤北不失庫倫臂援迤南熱河近圍各處亦得稍資鎮攝於近邊籌防大局均有裨益除咨行庫倫辦事大臣查照外所有飭調宣化練軍馳赴通州一帶及調庫倫練軍回駐經棚緣由理合恭摺由驛覆陳伏乞  
皇上聖鑒訓示謹

癸

津紳集捐辦團片

光緒二十年七月二十二日

再據天津縣紳士二品頂戴候選道王守善等稟稱此次倭人敗盟構毀沿海戒嚴天津爲近京重地必須多爲之備以杜敵人窺伺溯查咸豐年間粵匪竄擾廣商募勇禦賊郡城得以安堵厥功甚著迨光緒十年法越之役復經舉辦亦頗著聲勢津民果敢可用實爲他屬所不及擬請遴派知兵大員會督地方官紳勸集捐款募練團勇以補兵力之不足而固

畿疆之門戶惟是頻年災歉戶鮮蓋藏籌勸匪易所捐之款懇照新海防捐例請獎以期踴躍而資捍衛等情稟由天津司道會詳請奏前來臣維團練之法行之不善流弊甚多雖湘淮各軍起於團練然其後皆係節制之師故能戡定大雉今倭氛不靖該紳等稟請集捐辦團宜參用防軍之制募練本地之勇束以什伍以化



其築驚之氣助以忠義而作其敵愾之心平居用以保衛閭閻有  
急亦可徵調出境庶幾募一勇得一勇之力練一日有一日之效  
但口糧須略優厚而將領尤貴得人查署天津鎮總兵吳殿元久  
歷戎行素嫻韜略擬即飭派該總兵先行挑練一千人編列兩營  
屯紮津南一帶與淮練各營相爲犄角一切仿照天津練軍營制  
認真操練所需鎗械子藥飭局籌撥其薪水口糧雜支等項亦照  
練軍向章酌定由該司道等會督地方官飭勸紳商集捐支給事  
竣造報惟現值災祲之後物力凋敝勸辦甚難合無仰懇

天恩准照現行海防事例核給獎敘庶可鼓舞羣情集有成數於  
防務深有裨益除檄飭遵照外理合附片具陳伏乞

聖鑒敕部查照謹

奏

酌定海軍賞卹章程  
光緒二十年七月二十二日

奏爲酌定海軍交戰賞卹章程恭摺仰祈

聖鑒事竊近日倭人構釁戰局已開海戰之艱危較陸軍爲尤甚以全船性命爭勝負於風濤彈雨之中一船被沈卽全營覆沒自非嚴明賞罰無以鼓勵眾心臣疊次嚴飭提督丁汝昌認真督察如有臨陣退縮貽誤事機者立按軍法治罪決不姑寬其有奮勇立功捐軀死事者亦應優予賞卹以昭激勸據該提督擬定賞格有能擊破敵人大艦一隻賞銀一萬五千兩中艦一萬兩小艦五千兩奪獲船隻者按照大小加倍給賞其陣亡各員副將參將游擊給卹銀六百兩都司守備四百兩千總把總外委及駕駛管輪教習礮目等二百兩受傷者按照官階減半給予養傷之費至文員在船當差者道府照副參游同通州縣照都守佐雜教職舉貢

生監照千把外委之例核給匠役兵勇陣亡者給卹銀一百兩頭  
目一百五十兩受傷者分別等差酌給傷費一等給銀六十兩二  
等四十兩三等二十兩飭山海防支應局司道等核議詳請奏咨  
立案前來臣查該提督所擬各條係爲激勵戎行起見伏讀  
醇賢親王奏定海軍章程原摺內開如有章程未備及臨時應行  
變通者隨時酌擬具奏等語當時海上尙無戰事破獲敵船各賞  
格本未備列於章程傷亡卹養等項亦是臨時酌定之事現值軍  
情緊急倭人屢以新式快艦多隻伺隙來窺志圖一逞各兵船出  
則角逐洋面入則嚴防海口全恃該將士等不惜身命力與爭鋒  
一船得失關係匪輕亟應特立賞項俾知奮勉察核所定賞卹銀  
數比於泰西各國通行之例已屬力從節減自應懸爲定格庶有  
以策勵將士堅其趨功效命之忱合無仰懇

天恩俯准照擬辦理以振軍威而作士氣除分別咨行外理合恭摺具

奏伏乞

皇上聖鑒訓示謹

奏

覆奏海軍統將摺  
光緒二十年七月二十九日

奏為遵

旨據實覆陳恭摺仰祈

聖鑒事竊臣於七月二十七日准總理各國事務衙門電稱本日

奉

旨現在倭船屢窺海口海軍防剿統將亟須得人丁汝昌畏葸無能巧滑避敵難勝統帶之任嚴諭李鴻章於海軍將領中遴選可勝統帶之員於口內覆奏不得再以臨敵易將接替無人等詞曲為迴護致誤大局等因欽此伏讀之下惶悚莫名北洋海軍是臣專責提督丁汝昌疊被彈劾屢蒙

諭旨垂詢當此軍事緊急之時果有遷延避敵情事亟應隨時嚴參斷不敢稍涉徇護惟現在密籌彼此情勢海軍戰守得失不得

不求保船制敵之方敬爲我

皇上詳晰陳之查北洋海軍可用者只鎮遠定遠鐵甲船二艘爲  
倭船所不及然質重行緩喫水過深不能入海汊內港次則濟遠  
經遠來遠三船有水綫甲而行駛不速致遠靖遠二船前定  
造時號稱一點鐘十八海里近因行用日久僅十五六海里此外  
各船愈舊愈緩海上交戰能否趨避應以船行之遲速爲準速率  
快者勝則易於追逐敗亦便於引避若遲速懸殊則利鈍立判西  
洋各大國講求船政以鐵甲爲主必以極快船隻爲輔胥是道也  
詳考各國刊行海軍冊籍內載日本新舊快船推爲可用者共二  
十一艘中有九艘自光緒十五年後分年購造最快者每點鐘行  
二十三海里次亦二十海里上下我船訂購在先當時西人船機  
之學尙未精造至此僅每點鐘行十五至十八海里已爲極速今

則至二十餘海里矣近年部議停購船械自光緒十四年後我軍未增一船丁汝昌及各將領屢求添購新式快船臣仰體時艱款細未敢奏咨續請臣當躬任其咎倭人心計謫深乘我力難添購之際逐年增置臣前於豫籌戰備摺內奏稱海上交鋒恐非勝算卽因快船不敵而言儻與馳逐大洋勝負實未可知萬一挫失卽趕緊設法添購亦不濟急惟不必定與拚擊但令游弋渤海內外作猛虎在山之勢倭尙畏我鐵艦不敢輕與爭鋒不特北洋門戶恃以無虞且威海仁川一水相望令彼時有防我海軍東渡襲其陸兵後路之慮則倭船不敢全離仁川來犯中國各口彼之防護仁川各海口與我之防護北洋各口情事相同觀於前次我海軍大隊游巡大同江口彼卽乘虛來窺威海旅順迫我海軍回防則倭船卽日引去敵情大概可知伏讀疊次電

旨令海軍嚴防旅順威海勿令闖入一步又令在威海大連灣煙臺旅順各處梭巡扼守不得遠離等因

聖明指示洞燭機宜至今恪遵辦理北洋門戶庶無竄擾之虞蓋今日海軍力量以之攻人則不足以之自守尚有餘用兵之道貴於知己知彼舍短用長此臣所爲兢兢焉以保船制敵爲要不敢輕於一擲以求諒於局外者也至論海軍功罪應以各口能否防護有無疏失爲斷似不應以不量力而輕進轉相苛責丁汝昌從前勦辦粵捻曾經大敵疊著戰功留直後卽令統帶水師屢至西洋藉資閱歷及創辦海軍特蒙

簡授提督情形熟悉目前海軍將才尙無出其右者各將領中如總兵劉步蟾林泰曾等附資較崇惟係學生出身西法尙能講求平日操練是其所長而未經戰陣難遽勝統率全軍之任且全隊



並出功罪相同若提督以罪去官而總兵以無功超擢亦無以服  
眾心若另調他省水師人員於海軍機輪理法全未嫻習情形又  
生更慮僨事貽誤臣所不敢出也自來用兵謗書盈篋而卒能收  
功者比比皆是伏懇

聖明體察行開情事

主持定斷臣不勝迫切悚懼之至緣電奏未能詳盡謹繕摺由驛  
五百里據實覆陳伏乞

皇上聖鑒訓示謹

奏

與將無庸調津摺

光緒二十年八月初三日

奏爲遵

旨覆陳仰祈

聖鑒事七月三十日准總理衙門電稱本日奉

旨前據張之洞奏保總兵張春發潘瀛曾在廣西立功當諭李瀚章傳令該二員募勇北上茲據電稱南勇不宜於北路遠難以速到或令赴津聽候派營給管等語著李鴻章酌量情形應否飭令來津調遣之處卽行電覆等因欽此臣查張春發潘瀛前於法越之役頗著戰功現在一任右江鎮總兵一署高州鎮總兵均係兩廣極邊之地若俟招募成營後由陸北上至速亦須歲杪始能到防粵人不耐嚴寒不慣麪食李瀚章所稱南勇不宜於北路遠難以速到洵爲扼要之言至擬令來津聽候派營給管一節湘淮各

營招募新勇俱責成該將領等自行挑選精壯教習成軍卽歸其  
統帶所有營哨各弁亦須由統將揀派兵將相習臨陣方期可恃  
若以新來之將統素不相習之兵人地不熟調度不靈緩急斷難  
得力自倭事告警臣先後遴派精悍能戰之將在直東及淮徐以  
北陸續派募四十餘營但使餉械足敷儘可就近募練似無須借  
才遠省稽延時日徒增勞費所請將張春發潘瀛二員調津派營  
給管之處應請無庸置議理合恭摺

奏伏乞

皇上聖鑒謹

奏

籌款購備新械片

光緒二十年八月初三日

再倭人傾國之力圖據朝鮮必須厚集兵力相機進剿臣先後飭調原駐天津新城之盛字馬步全軍抽調蘆榆北塘各處防軍及旅順口之毅軍陸續馳赴前敵畿東沿海一帶未免空虛必須添營填紮前後招募新勇已有四十餘營總兵聶士成由成歡轉戰而北堅苦卓絕膽略均優現與提臣葉志超電商擬令添募數營歸其統帶此後隨時布置仍須續有增添總計應在六十營內外乃足以資調遣軍行以餉械爲大宗倭兵全用西洋新式鎗礮精銳無前非有利器斷難制勝自部議停購船械後津局往年所儲鎗礮除各營領用及協濟各省外現存無多而新舊各軍皆取給於此疊接山西河南撫臣函牘奉調各營所需軍械仍請由臣處添撥亟應購辦大批新式快鎗快礮以備撥用各國現守局外之

例禁止軍火出口須轉託洋商設法購運來華懸師遠征道路險  
艱轉運之費尤鉅昨接葉志超來電韓境銀價每兩僅易制錢七  
百有奇折耗過半所有添營購械轉運各費不可勝計與內地用  
兵情形迥異戰事既開利鈍遲速均難預期而各項開支刻難停  
緩前蒙

飭撥銀三百萬兩日久斷不敷用部庫支絀卽續請指撥亦恐緩  
不濟急再四籌思現在粵東海防較北洋稍緩或可設法通挪當  
卽電懇督臣李瀚章茲接電覆允在該省海防捐款內暫行撥借  
銀六十萬兩當用款浩繁之際得此有著的款稍應急需於防剿  
大局深自裨益理合附片具陳伏乞

聖鑒敕部查照謹

奏

奏留劉汝翼片

光緒二十年八月初三日

再二品銜前任津海關道劉汝翼於光緒十九年十一月服滿業經在籍呈報起復自應照例赴部候

旨簡用茲由籍入都道出天津查該道廉明篤實心細才長在直隸二十餘年資勞最深委辦機器局鉅細躬親力任勞怨講求製造條理井然辦有成效前仰蒙

懿旨優敘存記疊著清河道津海關道光緒十五年二月補授關道於吏治河防商情洋務均能實心經畫措置裕如現值倭人啟衅戰事方殷軍火待用浩繁關係甚重已檄委該道仍辦機器局務以資熟手相應請

旨將二品銜前津海關道劉汝翼留於北洋差遣臣藉收指臂之助惟津海關道係衝繁疲難四字最要奉

旨簡放之缺該道以禮去官服闋後例應開單請

簡劉汝吳曾膺繁劇現筦要差合無仰懇

天恩俯准遇有道員缺出仍予一體開列出自

逾格隆施除咨部查照外謹附片具陳伏乞

聖鑒訓示謹

奏

運銅赴朝鮮鼓鑄摺

光緒二十年八月初五日

奏爲朝鮮錢價太昂軍餉虧折過鉅設法運鑄以資補救恭摺仰祈

聖鑒事竊准總統朝鮮前敵各軍直隸提臣葉志超電稱各軍駐紮平壤以銀易錢庫平百兩作九十五兩每兩合錢七百五十文照此價值官兵一月應領之餉不敷半月之用昨據韓官閔丙寅面稱平壤現有鑄錢爐若備銅鉛解來製造按華錢兩文可鑄韓錢三文鑄成後發營通用於軍務地方深有裨益等語當飭總理前敵營務處直隸臬司周馥辦理朝鮮撫輯事宜浙江溫處道袁世凱辦理東征轉運事宜津海關道盛宣懷悉心籌議茲據詳稱天津現時銀價每兩約合制錢一千四百餘文與平壤相較軍士受虧過鉅該處錢少銀賤既難強令加價只有就地鼓鑄以資接



濟惟近年所購洋銅多係倭產來路已停若購自西洋又緩不濟  
急查戶部訂購銅鉛除業已解京外計天津招商局棧實存禮和  
行三四批白鉛二十三萬二千七百八十四斤十二兩又三井行  
末批銅四千三百七十七斤四兩又三井行第一批銅三十六萬九  
千零三斤又地亞士行末批銅二千四十二斤四兩統計銅鉛六  
十萬八千一百四十七斤四兩擬請移緩就急全數截留撥用俟  
軍務告戢再行照數采購解還部庫韓錢體質粗薄約須鉛六銅  
四存鉛尙不敷用擬再添購勻配解往平壤就原有鑪座及舊用  
員匠剋期起鑄所有運鑄等費均先挪墊俟錢鑄成按款扣還核  
計銀錢折值相當解交錢局核發各營收銀歸本會詳請奏前來  
臣查大軍前進百物騰貴一切食用均須現錢交易實爲最急之  
需藩屬川兵尤與內地不同韓錢市價本昂勢難強加抑勒我軍

以銀易錢按照減平及時價耗折幾至一倍有餘當此軍情艱苦用款浩繁何堪更增此意外鉅虧日久斷難支拄現擬就地鼓鑄雖有轉運工料之費而較之兌換之數所省已多韓錢不及華錢之精以兩文華錢可鑄三文尙爲合算就現有銅鉛添購白鉛約可鑄韓錢二十一萬五千餘串有此大宗錢款流通行使各營既免虧折市面得資周轉物價亦可漸平於軍務地方裨益匪淺此項銅鉛本備京局鑄錢之用現值軍需緊要自應移緩就急但使兵餉少一分耗折卽爲部庫省一分度支合無仰懇天恩俯准照辦臣卽將應用銅鉛飭由海道解至義州運赴平壤交由周馥袁世凱督率員匠妥速趕辦所有截留銅鉛應統歸軍需列收其運鑄等費就欸扣還由該司道開單彙銷是否有當理合恭摺由驛具陳伏乞

皇上聖鑒訓示謹  
奏

彙報前敵軍情摺

光緒二十年八月十八日

奏爲彙報前敵緊要軍情恭摺仰祈

聖鑒事竊自倭人構衅徵調繁興所有籌備事宜及逐日軍報疊經臣前後具奏並隨時電達總理各國事務衙門代奏在案軍情緊急瞬息百端前敵各軍及海防水陸各將領相距遠者至二千餘里但使電綫可通消息頃刻能達凡有探報商請各事俱由電綫來往較之文牘靈捷萬分臣仰體

聖主延望軍書之意於各路電報關涉倭事者無不密電總理衙門代爲陳奏不拘朝夕隨時

上聞有一日數電一電數事者既極詳實又無壅滯

宵旰勤勞之際便於

披覽俾中外全局俱得上徹

宸聰比於驛遞之奏章尤爲密速經欽奉電

旨欽遵在案現在前敵各軍在平壤者逐日交綏所有偵探布置  
接仗各情形尤關緊要除仍隨時電達外應將各電之關係前敵  
戰事者分日摘錄或一句或半月彙齊奏報一次以備稽查茲將  
八月初一日起至十五日止錄出各電彙繕清單敬呈  
御覽理合繕摺由驛具陳伏乞

皇上聖鑒謹

奏

據實陳奏軍情摺

光緒二十年八月二十日

奏爲軍情益急

臣力難支據實瀝陳仰祈

聖鑒事竊倭人起傾國之兵進圍平壤危急萬分前據葉志超疊次來電均轉電總理衙門代奏現接義州電報安州以北電綫亦斷葉志超自十五日以後並無續電風聞平壤業已不守其派護銘軍赴大東溝之海軍各艦於十八日在大鹿嶺洋面與倭船惡戰三時之久互有沈毀亦經轉電奏

聞並據各國探報倭人將以大股圖犯北京又云謀襲瀋陽現值水陸兩軍新有挫失兇險日張臣督率無方罪戾叢積謗議咎責實無可辭至此本末及統籌全局情形有不敢不披瀝直陳於聖主之前者方倭事初起中外論者皆輕視東洋小國以爲不足深憂而臣久歷患難略知時務夙夜焦思實慮兵連禍結一發難

收蓋稔知倭之蓄謀與中國爲難已非一日審度彼此利鈍尤不敢掉以輕心凡行軍制勝海戰惟恃船礮陸戰惟恃鎗礮稍有優絀則利鈍懸殊倭人於近十年來壹意治兵專師西法傾其國帑購製船械愈出愈精中國限於財力拘於部議未能撒手舉辦遂覺稍形見絀海軍快船快礮太少僅足守口實難縱令海戰臣前奏業已陳明至陸路交鋒倭人專用新式快鎗快礮精而且多較中國數年前所購舊式者尤能靈捷及遠此次平壤各軍倭以數倍之眾布滿前後分道猛撲遂至不支固由眾寡之不敌亦由器械之相懸並非戰陣之不力也臣屢電奏前敵兵勢過單但北洋沿海各要口關係至重正議添兵更無餘力除盛軍係津沽游擊之師全隊調往外復經抽調北塘蘆臺山海關旅順各防隊已覺處處空虛昨又撥調大連灣銘軍四千人移緩就急實萬不得已

之舉至招募新營必須數月精練徵調外省多屬零星湊集又難  
剋期到防且有兵尤須有械舊儲鎗械本屬無多開戰後設法購  
運來華尙需時日此皆非倉猝所能集事者也臣忝司軍旅三十  
餘年從前勦辦髮捻薄奏微效然皆內地賊匪與外洋情勢迥殊  
數月以來朝作夜思寢食俱廢迄無起色焦憤莫名仰荷

聖慈不加重譴僅予薄責策勵將來感激涕零罔知所報際此時  
艱方亟斷不敢自請罷斥致蹈規避之嫌惟衰病之軀智力短淺  
精神困憊以北洋一隅之力搏倭人全國之師自知不逮若不熟  
思審處據實陳明及至貽誤事機百死詎足塞責伏願

聖明在上主持大計不存輕敵之心責令諸臣多籌巨餉多練精  
兵內外同心南北合勢全力專注持之以久而不責且夕之功庶  
不墮彼速戰求成之詭計故就目前事勢而論惟有嚴防渤海以



固

京畿之藩籬力保瀋陽以顧東省之根本然後厚集兵力再圖大舉以爲規復朝鮮之地奉天地廣兵單與臣處相距過遠且爲將軍及練兵大臣駐紮處所一切調度未便遙制應請

特簡重臣督辦以便調遣而專責成北洋海軍尙有定遠鎮遠兩鐵艦輔以快船蚊雷各艇與陸路礮臺聲勢相倚各口守臺弁勇均係訓練有素合以新募各營扼要填紮倭人若以大股來犯臣當督率各將領奮力迎擊斷不敢稍有疏虞上勞

宸慮至臣前奏所請撥發餉項一切募軍購械及水陸轉運各事支發浩繁年內外亟須接濟屆時或請撥部款或酌借洋債再行奏明請

旨遵行所有通籌情勢據實懇陳各緣由謹繕摺由驛六百里馳

奏伏乞

皇上聖鑒訓示謹

奏

平壤敗退自請嚴議摺

光緒二十年八月二十三日

奏爲倭兵猛撲平壤諸軍退至安州據實奏參並自請嚴議恭摺  
仰祈

聖鑒事竊查倭人起兵三四萬分道來撲平壤四面環攻連日力  
戰危急情形經臣疊次電達總理衙門代奏在案茲據葉志超電  
稱倭寇自十四日午刻繞竄順安後路於平壤附近山頭設礮百  
餘尊四面來攻鎗礮並發各將領分道奮力迎勦該提督重懸賞  
格如將倭兵擊退賞銀三萬兩奪礮一尊賞銀千兩生擒六十兩  
取首級三十兩鎗刀馬匹亦均列賞兵勇合力血戰當派衛汝貴  
馬玉崑兩軍將江東之賊擊退七八里鎗斃不計其數馬玉崑奪  
礮七尊又由江東縣北路渡來大股及成川之賊萬餘人同時來  
攻江自康營該提督與左寶貴豐陞阿親督數千人設伏夾攻至

晚倭勢始弱各軍奮力齊上追至四里外生擒及割取首級二百餘名鎗斃不計其數我軍其傷亡三百餘人倭復由龍岡西北分道來攻盛軍各營壘該軍先已調出五成隊過江倭奸探知實情卽來猛攻數次不下該提督恐孫顯寅在外游擊不能兼顧卽調衛汝貴整隊回擊倭始敗退鎗斃千餘我軍傷數百人是日喜獲大勝十五日丑刻倭大隊越山而來各將領分段堅守以待又挑選精銳兵勇游剿倭兵抵死不退兩軍對施鎗礮連夜達旦至十六日早仍四面來攻愈急平壤城北原有奉軍三營礮臺連日被其打燬倭換班三四次意在直撲北城左寶貴力疾親督三營並諸將迎頭血戰倭抵敵不住始退左寶貴奮勇前追忽胸前中鎗陣亡甫收隊回城而倭漸又逼近各軍苦戰五晝夜子盡糧絕戰死溝壑者不忍目視四山大礮齊向城營施放兵勇無地立足祇

得且戰且退經過順安肅川一帶倭卡數十處層層打出文武官弁兵勇陣亡倉猝無從確查十八日早到安州倭竟敢追出百餘里始退仍必跟蹤齊進若由安州堵擊無險可扼且子彈業已打完該提督會商衛汝貴豐陞阿等先拔隊過安州肅川博川兩江之閒分別整頓休息該提督督盛軍步隊二營奉軍馬隊一營奉天盛字馬步五營在博川畫江固守一面調呂本元劉盛休前來擇要駐扼候各軍整頓有緒再相機進止此次各軍血戰之苦數十年所未見陣亡文武員弁容查明請卹請先據電轉奏並自請嚴議處治等情前來臣查平壤各軍孤懸危地原止一萬五千人內尙有分防後路安州等處葉志超自牙山退出僅二千餘人奏明傷病甚多器械不全難遽搏戰倭人遽以三四萬之眾猛撲環攻各將領督率弁勇連日苦戰斃倭無算實屬奮勇出力不顧身

命記名提督高州鎮總兵左寶貴人歷戎行卓著勞勩襄創力疾血戰捐軀忠勇性成深堪憫惻應請

旨照提督陣亡例從優議卹並於各省立功地方建立專祠可否予諡出自

恩施其餘陣亡文武員弁應俟查明彙案請卹總統各軍直隸提督葉志超力疾督戰統領盛軍宿夏鎮總兵衛汝貴統領毅後軍記名提督馬玉崑統領奉天盛字營

御前侍衛副都統豐陞阿均督軍苦戰數晝夜因賊眾愈集愈多子盡糧絕退出平壤究有應得之咎應請

旨分別懲處至臣忝總帥于深知前路兵力太單疊經電奏有案祇以近畿空虚沿海防軍難再抽撥調募各營路遠又難驟集竟無餘力派往應援以致眾寡不敵實屬調度無方應請

行嚴加議處再據馬玉崑續電該軍鎗械無失須到義州方可收  
隊整頓葉志超續電現守柳川江口僅盛軍步隊兩營呂本元馬  
隊兩營並招集落後勇丁日戰且行倭以大隊跟闖勢難固守將  
來若能扼住義州徐圖厚集兵力再謀大舉合併聲明除先已將  
平壤戰狀電奏並以後一切情形仍隨時電陳外理合繕摺由驛  
馳陳伏乞

皇上聖鑒訓示謹

奏

李文忠公奏稿卷七十八